

REGIONAL NEWS

HEADLINES:-

1. An chairman Dr. Arvind Panagariya hova Finance Commission 16-na member-te chuan vawiin khan ni 3 cham turin Aizawl an rawn thleng.
2. Home department chuan kar hmasa Nilaini khan ramri buai chungchang inbiakna atan Assam sorkar hnenah lehkha a thawh leh.
3. Prime Minister Narendra Modi-a'n Artificial Intelligence lamah India-in a thawh hlawk hle tih a sawi.
4. Health & Family Welfare Ministry-in ni 100 chhung awh, TB natna umbo beihpui a thlaknaah rTB vei mi nuai 5 chuang hmuh chhuah a ni.

<><><>

FINANCE COMMISSION

An charman Dr. Arvind Panagariya hova Finance Commission 16-na member-te chuan vawiin khan ni 3 cham turin Aizawl an rawn thleng.

Finance Commission chairman leh member-te hi naktuk leh Thawhlelni cham tura lokal an ni a. Finance department hotute sawi danin Mizoram sorkar chuan Finance Commission 16-na hnena Mizoram sum mamawhte lo thlenna tur memorandum chu an peihfel tawh a. Sawihona hnahnung ber pawh a hmawr an bawh tawh a ni. Finance department atanga thu dawn danin FC 15-na khan Mizoram tan, a bik takin post devolution revenue deficit grant (PDRDG) hmangin kum 2021 leh 2026 inkar chhung atan cheng vaibelchhe 6,544 chauh kum 5 atan Mizoram a ruahman sak a. Hei hian Mizoram sum harsatna a puhru pha lo hle niin finance department hotute chuan an sawi a. Hei bakah hian tualchhung sorkar inrelbawlana atan cheng vaibelchhe 713 ruahman a ni a. Cheng vaibelchhe 259 chu chhiatrupna thlen thulha chhawmdawlana tur leh hriselna lam tan cheng vaibelchhe 115 ruahman a ni bawh.

PDRDG bikah hian Mizoram chu kum 2021-22 atan cheng vaibelchhe 1,790 ruahmansak a ni a, 2022-23 tangka kumah cheng vaibelchhe 1,615 ruahman a ni a, kum 2023-24 tangka kum atan cheng vaibelchhe 1,474 ruahman niin tangka kum kallai 2024-25 atan cheng vaibelchhe 1,079 ruahman a ni a. Tangka kum thar 2025-26 atan phei chuan PDRDG hnuaiah cheng vaibelchhe 586 chauh Mizoramin a hmu tawh dawn a ni. Mizoram sum dinhmun hi Covid-19 hrileng khan a tichhe zual nasa em em mai a, sum hmuh tura beisei lawk cheng vaibelchhe sang tel dawn kim loh a awm a ni. Hei hi a dinhmun a nih avangin FC 16-na lakah hian sorkar beiseina a sang a. Chuti chung chuang eng ti ang takin nge sum min ruahmansak ang tih chu a hriat loh.

FC 16-na lo zin tur avang leh Nilaini khi sorkar pisa chawlh a nih avangin Mizoram assembly inkhawm kal lai pawh tunkar chhung zawng chu an chawl dawn niin Assembly secretariat atanga thudawn chuan a sawi a ni. FC 16-na lo zinte hi vawiin khan I&PR Minister Dr. Vanlalhlana, Adviser to Chief Minister Pu TBC Lalvenchhunga, chief secretary Pu Khilli Ram Meena, PWD, Disaster Management & Rehabilitation Department leh Geology & Mining Department hotute'n an lo dawngsawng a. Lengpui atanga Aizawl an panna-ah Hunthar lei tla hniam chu a hmunah endikin ruahmannate an sawiho a ni.

He hun ah hian Disaster Management & Rehabilitation Department-a thawktute leh Public Works Department hotute chuan kum 1990 atanga 2024 chhung a helai hmun a leilung chet dan leh inkalpawhna kawng a harsatna hrang hrang a thlen thin dan te tarlangin lei tawlh hniam zel tur ven nana hmalakna thenkhat kalpui a nih dan te an sawi a. Mizoram khawpui Aizawl luhchhuahna kawng pawimawh tak a nih avangin leh helai hmun a chengte tan harsatna lian zawk a thlen loh nan ruahmanna an duan te chu an hrilhfiah bawk a ni. He hun a tarlan danin Hunthar lei tla hniam nghawng zau zawng hi hectare 24.3 zet a ni.

Naktuk Thawhtanni hian official-te nena an inkawmho ang a, hetah hian Mizoram sorkar lamin memorandum thehlutin Mizoram mamawh hrang hrang an thlen ang a. Chawhnu dar 12 leh minute 40-ah Aijal Club-ah chanchinbumite an kawm ang a, tlawmngai pawl leh pawl dang dang an kawm bawk ang. A tuk Thawhlejni-ah chuan chairman chuan Delhi pana Aizawl chhuahsanin member-te leh anmahni zuitu official-te chuan Zoram Medical College & Hospital tlawh pahin Thenzawlah an thleng anga zan an riak ang a, Serchhip district bawrhsapin hnam ziarang lan theihna entirna hun huaihawtin zanriah a buatsaihsak ang a. A tukah Serchhip khawpui lutin heta tang hian helicopter hmangin Lengpui tumhmun an pan ang a. Lengpui atang hian Delhi lamah an haw leh dawn a ni.

<><><>

ASSEMBLY SESSION

Assembly inkhawm kal mekah sorkar atanga dan siam tur duan a changtu minister-te'n an putluh tur 8 a lut tawh.

Assembly secretariat atanga thu dawn danin dan siam tur leh dan dinglai siamthat tur lutte hi - Labour, Employment, Skill Development & Entrepreneurship (LESDE), Urban development & poverty alleviation (UD&PA), Finance, Higher & Technical Education, Information & Public relations, Excise & Narcotics leh Local Administration department te a ni a. LESDE hian bill pahnih an thehlut ni a hriat a ni. Sorkar bill thehlul zinga ngaihven hlawh zual chu Excise & Narcotics minister-in a putluh tur wine leh beer chungchanga Mizoram Liquor (Prohibition) Act, 2019 siam thatna tur leh Higher & technical education minister Dr. Vanlalhlana'n Mizoram state university bill a putluh turte hi a ni awm e. Sorkar dan siam tur chhawpchhuahte hi March ni 3 (Thawhtanni) leh March ni 6 (Ningani) te khian putluh a sawiho a ni dawn niin business advisory committee (BAC)-in assembly inkhawm hun hman dan tur a duan lawkah tarlan a ni.

March ni 20 thleng awh tur assembly inkhawmah hian tun thlengin House chhunga chhan chi zawhna 889 a lut tawh a, ziaka chhan chi zawhna 104 a lut tawh bawk a. House dawhkana dah tur lehkhaw pawimawh 8 a lut tawh a, official resolution putluh tur 1 a a lut tawh bawk. Puan tawh angin tun tum budget session-ah hian March ni 4 khian finance changtu chief minister Pu Lalduhoma'n tangka kum thar (2025-2026) a Mizoram tana sum ruahman (budget) leh tangka kum kal lai a sum dil belhna (supplementary demands for grants for 2024-2025 chu House-ah a pharh dawn a ni.

<><><>

MIZORAM MISSIVE TO ASSAM

Home department chuan kar hmasa Nilaini khan ramri buai chungchang inbiakna atan Assam sorkar hnenah lehkha a thawh leh.

Home department hotute hnen atanga thu dawn danin tun hi lehkha vawi 3 an thawwna a ni tawh a, a hmasa pahnih an thawnte chu chhanna an la dawng lo. Nikum August ni 9-a Aizawl state guest house a Mizoram leh Assam sorkar aiawhte inbiakna-ah khan kumin March ni 31 hma ngei a minister 2-te inbiakna chhonzawm turin dah a ni a. Hemi bawhzui hian home department chuan Assam sorkar official-te hnenah minister pahnih inbiak hma a ramri buai chungchang kimchang taka lo sawiho ni se tiin rawtna an thlen a, chhanna an la dawng rih lo a ni. Home department hotu pakhat chuan minister-te an inbiak hma ngei a official-te'n engkim lo relho phawt chu thil nihphung tur leh inremna atana pawimawh a an ngaih thu Akashvani Aizawl a hrilh a. A tul ang ang kimchang sawiho a nih hnu-ah minister ve vete remtihna lak kha thiltih dan tha ber ni a an ngaih thu a sawi bawh a ni.

Ramri chungchangah hian Mizoram leh Assam minister-te hi sorkar hmasa MNF sorkar hunlai atang khan an inbe tan tawh a. Vawi 4 an inbe tawh a. Aizawlah vawi 3 leh Guwahati-ah vawi 1 an inbe tawh a ni. Nikum August ni 9-a an inbiak kha ZPM sorkar hnu a minister-te inbiak hmasakna ber a ni a. Mizoram sorkar aiawhte chu home minister Pu K. Sapdanga'n a ho a, Assam aiawhte chu border protection & development minister Pu Atul Bora-a'n a ho thung a. Kumin March ni 31 ral hma ngei a Guwahati khawpui a inbiak chhonzawm tura dah a nih lai-in a thlengtu tur Assam lam hian tun thlengin thu an la rawn nei lo a ni.

<><><>

ASSEMBLY-WATER SUPPLY

Mizorama district hmunpui hrang hrangah Hnahthial leh Serchhip khawpui-in tui an dawng zing ber a, Mamit khawpui-in an dawng khat ber.

PHE minister Prof Lalnilawma'n Assembly a BJP member Dr. K. Beichhua zawhna a chhan danin Hnahthial leh Serchhip khawpui a chengte hian thla khat chhungin vawi 4 emaw vawi 5 emaw tui an dawng thin a. Khawzawl leh Saitual khawpui a chengte'n thla khatah tui vawi 4 an dawng a. Aizawl khawpui a chengte'n thla khatah vawi 3 an dawng thung. Siaha, Champhai leh Kolasib khawpui a chengte'n thla khatah vawi 2 emaw vawi 3 emaw tui an dawng a. Lunglei leh Lawngtlai khawpui a chengte'n thla khatah tui vawi 2 an dawng a, Mamit khawpui a chengte erawh chuan thla khatah vawi khat chauh tui an dawng a ni.

<><><>

SPL. RATION CARD

Mizoram sorkarin khawsak harsa zawk te tana State Special Ration Package a duan hnuaiah ration buhfai (ration card sen) man tlawma dawngtu mi 29,785 an awm tawh.

Nikum December 2024 atanga khan Mizoram State Special Package hi hman tan a ni a, he ruahmanna hnuaiah hian mi pakhat tan buhfai Kg.8 zela sem niin, kg ah cheng 20 in an khul thei a ni. Heng mite hi kg khat cheng 30/-a buhfai la thin card var neitute zing ami an ni hlawm. Food, Civil Supplies and Consumer Affair department chuan card sen

mamawhte tan mahni bialtu DCSO-ah dil theih a nih thu hriattirna a tichhuak a. Tun dinhmunah AAY (card eng) hnuaiah Mizoram-ah ration card 25,750 awmin, hlawkpuitu mi 62,964 vel an awm a. PHH (card pawl) hnuaiah ration card nuai 1, sing 5 leh 555 awmin, a hmang tangkaitu mi nuai 6, sing 3, sang 3 leh 980 vel an awm thung. Mizoram puma non-NFSA (card var) hnuaia ration card hi nuai 1, sang 6 leh 589 niin, a hmangtu mi nuai 4, sing 4, sang 1 leh 902 an awm mek. Hetih lai hian ration lakna atana hman ni lo NER (not entitled ration card) 206 a awm mek a, heng ration card hi document atan chauha hman tur a ni a, NER chungchangah hian Food, Civil Supplies & consumer Affairs Department chuan nikum July thla khan thuchhuah siamin Minister, MLA leh Group 'A' officer chinte chu NER card-ah inlet vek turin a lo hriattir tawh a ni, tunah hian group 'A' chin list dil mek nia thu dawn a ni.

<><><>

AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchintha puan leh a ni ang.

<><><>

MANN KI BAAT

Prime Minister Narendra Modi-a'n thluak finna, Artificial Intelligence lamah India-in a thawh hlawk hle a ni, a ti. Vawiin Akashvani-a Mann Ki Baat hun a hmannaah he thu hi sawiin thil thar siamchhuah leh enchhin lamah India chu midang hnungah a awm biklo a ti a, Paris-a AI Action Summit-a telnaah AI sector-a India-in khawvel fak a hlawh chu a lawm tak zet a ni, a ti.

Tun thla ni 28-ah National Science Day hman anih tur thu sawiin ngaithlatute chu he ni hi 'One Day as a Scientist' atana hmanga, research lab, planetarium emaw Space Centre emaw tlawh ni atan hmang turin a ngen a, thla leh March ni 8-a khawvel puma Hmeichhiate Ni hman tur chungchang pawh tarlangin he ni pual hian a social media account-te ramchhung hmun hrang hrang atanga thlan chhuah hmeichhia-ten an hnathawh leh tawn hriatte tarlan nan a hman tir dawn a ni, a ti a, heta tel duh hmeichhiate chuan he hun atana a bika siam, NamoApp atangin khawvel pum hriat atana an duhte an tarlang thei dawn a ni, a ti.

Ramchhung hmun hrang hrang atanga infiammi sing 1 sang 1 telna, Uttarakhand-a National Games neih chungchang pawh sawiin Prime Minister chuan kumin Games-a a ber nihna hauhtu, tleirawl leh rawlthar thahnem tak an awm chu a ropui tak zet a ni, a ti a, Games neih chungin taksa thau lutuk chungchang a sawichhuah thu tarlangin ram hrisel leh inthazo tak ni tur chuan thau luat tukna do let dan tur ngaihtuah a ngai a ni, a ti.

Kumina zirna chungchanga inkawmhona, Pariksha Pe Charcha hmanna episode 8-te chu NaMoApp-ah dah a ni, a ti a, Board Exam hmachhawn tur zawng zawngte hnenah duhsakna a hlan bawk.

<><><>

TB ELIMINATION CAMPAIGN

Health & Family Welfare Ministry buatsaiha ni 100 chhung awh, TB natna umbo beihpui thlak chhungin ramchhung hmun hrang hrangah TB vei mi nuai 5 chuang hmuh chhuah a ni a. District 455-a beihpui thlaknaah TB vei mi nuai 3 sing 5 sang 7 hmuh chhuah a ni. Beihpui thlak chhung hian mi vbch 10 chuang endik an nih thu Health & Family Welfare Ministry chuang a sawi a, thingtlang khaw kil khawrte pawh tuam anih thu a tarlang bawk.

<><><>